

Dianio 8-7-'91

A ruba

Antaño

CUMPLI OF NO CUMPLI PERO TA SANTANA BO TA BAY



Ora un hende ta muri, nos no sa kico ta pasa cuné. Bida di hende ta un misterio y su morto ta laga nos atras cu hopi pregunta: Pakico? Pakico awor? Pakico esaki? Kico a bira di dje? Tur cos a caba? El a drenta un bida mihó? E unico cos cu nos sa sigur, ta cu Señor ta bin busca nos tambe un dia.

Velorio (otro ta bisa beloria) pero esaki ta algo di antaño, cu debi cu nos tin biaha ta manera carné, esta di haci loke otro ta haci, y cu e tempo moderno a drenta, esaki a keda manera den olvido. Pero ki bunita ta ora nos corda riba e velorionan di e Aruba Antaño. E resto mortal den su caha mei-mei di sala, cu e tobo di ijs bao di esaki, y rosario ta worde lesa, y pafor otro ta dal nan mushi di rom blanco, huma nan cigá, y aunke ta un tiki falta di respet, pero disfrutando di e chasco (chiste, joke) o con cu bo kier yamé. Y asina tene e stoma cu un chuculati di pinda, y goza di e dia cu ta habri. Pero asina tambe hopi di e costumbernán a bay perdi, mescos cu e buniteza y e manera di nos bieunan.

Tabatin of tin ainda mi no sa di un obra teatral di e autor Samuel Becket, titulá: "Warda riba Godot". Dos hende mitar loco, mitar sabí, ta pasa hopi miseria den bida. Nan ta fadá, bida a desapuntá nan, nan tin masha poco diberticion, nan no tin famia, ni cas, ni trabao...pero tin un luz chikito den nan bida; nan lo ta salbá. Meneer Godot a bisa cu e ta bini awenochi. Ora meneer Godot ta bini, nan lo ta salbá. Meneer Godot por soluciona tur problemanan y nan lo cuminsa un bida nobo. Asina nan ta keda biba den speranza. Na un dado momento ta bini un homber cu por ta meneer Godot...pero e ta un otro. Na fin di e promé acto un mucha ta bin bisa: "Meneer Godot no ta bini awenochi, pero mayan sí lo e bini sigur". E mesun mucha ta bin na fin di e di dos, esta e ultimo acto: "Meneer Godot no ta bini awenochi" Y asina e dos homber ta sigui warda. Godot por bini mayan, kizasé otro mayan, nos no sa. Ma sigur ta, cu le bini. E ora ey tur sufrimento a caba y tur maldad ta lubidá. Riba e foto por mira e ultimo Lugá di Sosiego.